

## 每週經課朗誦經文(巴克禮台語漢字)2015/09/13

### 共同經課 - 1 箴言一章二十節~三十三節

20 智慧佇街路大聲叫，佇開闊的所在出伊的聲，21 佇鬧熱的街路頭大聲叫，佇城門口，佇城內講出伊的話，22 講：戇直人愛戇直，侮慢人愛侮慢，愚戇人怨恨智識，欲到甚麼時啊？23 我責備恁，恁著越轉；看啊，我欲用我的神降落互恁，用我的話指示恁。24 因為我曾叫，恁毋聽；我曾伸手，無人致意；25 恁反轉看輕我一切的勸戒，毋肯受我的責備。26 所以恁抵著患難，我欲清笑；恁抵著驚惶，我欲弄眼。27 恁的驚惶，親像狂風吹來；恁的災禍，親像捲螺風掃來；患難痛苦臨到恁身上。28 彼時，in欲求我，我毋聽，切切尋我，尋袂著。29 因為，in怨恨智識，無歡喜敬畏耶和華，30 毋聽我的勸戒，藐視我的責備，31 所以in欲食家己行做的果子，互in得著所計謀到飽厭。32 戇直人的悖謬，欲互伊致到死；愚戇人安逸，欲互伊致到滅無。33 獨獨聽趁我的，欲安然倚起，欲享受安靜，無驚抵著災禍。

### 共同經課 - 2 詩篇十九篇

1 [大衛的詩，交互樂官。] 諸個天講起上帝的榮光；穹蒼報揚伊的手所做的。2 此日對彼日發出言語；此暝對彼暝傳出知識。3 無言無語，in的聲無通聽見。4 in的準繩遍佇天下，in的言語到佇地極。上帝佇in中間為著日頭安置帳房；5 日頭親像新子婿出伊的房，亦親像猛勇的人歡喜走伊的路。6 伊對天的此旁出，惹到天的彼旁，無一項物囷密，無得著伊的熱氣。7 耶和華的律法齊全，會互人的心神活起來；耶和華的干證確實，會互戇人有智慧。8 耶和華的教示正直，會互人的心歡喜；耶和華的命令清潔，會互人的目矚光明。9 敬畏耶和華的道理是清氣，永遠存在；耶和華的判斷真實，一概是公義 10 一一比金，比多多好金卡通欣慕；比蜜，比蜂房滴落來的蜜卡甜。11 閣你的奴僕對諸個受警戒，守諸個有大賞賜。12 是誰會知伊的失錯啊？求你除去我暗靜的過失。13 求你阻止你的奴僕無故意犯罪，毋准彼個罪惡管轄我，我就完全，免犯大罪。14 耶和華——我的石磐，救贖我的主啊，願我的嘴所講的、心所想的佇你的面前得著接納。

### 共同經課 - 3 雅各書三章一節~十二節

1 我的兄弟啊，毋通多多人做先生，因為知咱欲受卡重的審判。2 因為咱眾人佇多多項跋倒；佇講話無跋倒的，就是做完全的人，也會約束伊通身軀。3 咱下馬咬韁佇馬的嘴，互in順趁咱，就管轄in通身軀。4 閣你看，許個船雖然許大隻，互大風掃伊，猶原是用細細的舵，互伊轉越照舵公的意思所愛。5 按呢，舌是細細的體，猶久講大話。你看，小可的火燒樹木偌多啊！6 舌就是火，佇咱百體中做不義的世界，拍拉慘通身軀，一生的行動對伊發火，伊家己的火是對地獄發。7 因為逐類的走獸、飛鳥、蟲□、水族，攏受制壓，也已經互人類制壓；8 獨獨舌無人會制壓，是無停歇的歹物，有死的毒滿滿。9 咱用伊謳咭主、就是父，閣用伊咒詛人，就是照上帝的款式來創造者。10 謳咭及咒詛像一個嘴出。我的兄弟啊，這是毋應該！11 水泉豈會對像一孔流出甜的苦的嗎？12 我的兄弟啊，無花果樹會生橄欖嗎？抑是葡萄樹會生無花果嗎？按呢對鹹的流出餌(chiáⁿ)的也袂會。

### 共同經課 - 4 馬可福音八章二十七節~三十八節

27 耶穌及學生出去，到該撒利亞腓立比屬許個鄉社；路裡問伊的學生講：「人講我是是誰？」28 in給伊講：「行洗禮的約翰；也有人講以利亞；閣有人講先知中的一個。」29 伊閣問in講：「若是恁講我是誰？」彼得應伊講：「你是基督。」30 伊就禁戒in，莫得將伊的事給人講。31 就教示in講：「人子的確著受多多苦楚，互諸個長老、祭司頭、經學士棄揀，閣受害死，過三日就復活。」32 耶穌用此個話明明給in講，彼得牽來責備伊。33 若是伊越轉身，看伊的學生，就責備彼得講：「撒但，退去我的後面！因為你所想毋是上帝的事，是人的事。」34 就叫眾人及伊的學生來，給in講：「若有人愛隨我，就著看無家己，夯伊的十字架來隨我。35 因為，見若愛救伊的生命的，欲失落伊；見若為著我及福音來失落伊的生命的，欲救伊。36 人若得著全世界，來喪失伊的生命，有甚麼利益？37 因為人欲出甚麼來對換伊的生命？38 凡若佇此個姦淫有罪的世代，掠我及我的話做見諂的，人子用父的榮光，及諸個聖的天使來的時，也欲掠伊做見諂。」